

MULEGNS: Café «Sibiria»

Schi malancuneia fò bagn

G.N.S. Cant tgi vo fitg a cor ed è en deletg da tadlar. Canzungs rumanstschas tgi nous cunaschagn bagn, tgi sveglian er las pi belas regurdientschas agl taimp da scola, da giuventetna e da malancuneia. Tot chegl cumpeglia la miniatura da cant cun ena cantadoura, dus cantadours ed en actour.

Tenor igl codesch da program digl Origen Festival Cultural era annunzta per igls 13 da fanadour allas 15.30 aint igl hotel Liun agls Mulegns la premiera digl «Café Sibiria». Tge tgi era da spitgier era dantant strousch ancunaschaint agls interessos tgi èn nias per assister all'amprema preschentaziun digl «Café Sibiria». Igl pi bler tgi era public era, tgi sa tracta d'ena miniatura da cant. Chegl tgi igl auditori è alloura santia ed er via è sto en deletg cantic tgi è retschet er anc en vistgia teatral tgi mareta igl predicat excellent.

Pieder Caplazi da Sumvitg

La basa pigl cuntign dalla miniatura cantica èn canzungs rumanstschas fitg popularas. Per far la punt tranter chellas lascha Giovanni Netzer rachintar an pled e maletg l'istorgia digl pastizier-confisier Pieder Caplazi da Sumvitg (1832 - 1873). Da gioven era el emigro an Pologna e mano a Warschau cun success ena pastizaria. Lò è el betg angal fatg



Ena culissa singulara ainten la sala digl hotel Liun agls Mulegns per cantar ed interpretar l'istorgia da Pieder Caplazi an plets e tungs.

affars ainten la veta professionala, mabagn fascheva igl Sursilvan er zuppo affars, affars betg lubias. La consequenza è stada tgi el è nia condemno dad eir an Sibiria e luvrar ainten las minieras. Graztga agl sies bung sa cumportar è el quatter onns pi tard nia amnesto digl tribunal ed è turno a Sumvitg e catto dalla sia famiglia angal ple sia mamma tgi era neida orva.

Canzungs ple tgi adequattas

An chel taimp tgi Pieder Caplazi ed igl sies amei Alexander Cagienard èn stos agl ester, on els savens gia gronda malancuneia, pigl li nateiv, pigl Grischn, per las muntognas ed er per igls confamigliars. Ainten la preschentaziun «Café Sibiria» surpeglian canzungs da dalla patria, digl pouresser, dalla notg e dalle muntognas da consolar Peider Caplazi. Rudi Netzer, el è catto persiva canzungs adequattas tgi dattan all'istorgia digl Sursilvan en vistgia cun melodias cun las pi belas calours messas an tung.

Pader Alexander Lozza, Bonifazi Plaz e Giatgen Uffer

Pieder Caplazi, per chella rolla segna Manuel Schunter, tgi è en absolvent dalla Scuola da teater Dimitri, è dasperas en actour excellent er en rachintader tgi dat agl «Café Sibiria» pir dretg la noda singulara. L'interpretaziun cantica da Sybille Diethelm, Martin Mairinger e Clemens Kölbl, è schi fegna e precisa, ena exactezza sonora e da bellezza. Remarcabel è cunzont tgi la sopranista, igl tenor ed igl bari-

ton cantan ordafora. Tgi Rudi Netzer è en om digl rom, schi vo per cant ins so e la schelta dallas canzungs savess betg esser migra. Interpretadas vignan las suandontas canzungs: «Igl nurser» tenor en text da pader Alexander Lozza e mess an notas dad Ernst Broechin, «Igl fridel», tgi Bonifazi Plaz è mess sen palpieri e tgi è mademamaintg nia intuno dad Ernst Broechin. Impressiunonta è alloura stada la canzung «Mesanotg», tgi pader Alexander Lozza è scretg e catto cun Gion Duno Simeon en cumponist tgi è tgappia tge tgi igl pader è lia deir ed er cumponia la melodia lotiers. La canzung «Alla Tgalavaina», tgi Alfons Tuor segna per igls plets e Georgius Schmid da Grüneck è fatg la cumposiziun, è Rudi Netzer tscharnia per la scena noua tgi Pieder Caplazi e sies amei Alexander Cagienard fon alianzas cuagl militer. Plagn sentimaint è alloura stada la canzung «Laiet alpin», tgi è survagnia igls plets da Giatgen Uffer e la melodia dad Ernst Broechin e tgi igl trio è canto a all'antschatta digl «Café Sibiria» ed alla fegn cura tgi Pieder Caplazi turna a Sumvitg e catta la sia mamma orva ed igl li noua tgi el è ossa daveiras sulet. «Ia stung sulet sensom la sponda...».

Preschentaziuns

Agl Mulegns allas 15.30 hotel Liun, igls 20 e 27 da fanadour ed igls 3 e 10 d'avost.

A Riom Clavadeira allas 12.00, igls 22 e 29 da fanadour ed igls 5 e 12 d'avost. Allas 17.00, igls 30 da fanadour ed igls 2, 3, 9, 11 e 16 d'avost.

Antrada 20.- fr. I vala la pagna dad eir agl «Café».



Sibylle Diethelm gioia la rolla dalla mamma da Pieder Caplazi.